

Trefniadau ar gyfer Comisiynu Gwasanaethau – Cyngor Gwynedd

Blwyddyn archwilio: 2023-24

Dyddiad cyhoeddi: Mehefin 2025

Cyfeirnod y ddogfen: 4973A2025

Paratowyd y ddogfen hon fel rhan o waith a gyflawnir yn unol â swyddogaethau statudol.

Os ceir cais am wybodaeth y gallai'r ddogfen hon fod yn berthnasol iddi, tynnir sylw at y Cod Ymarfer a gyhoeddwyd o dan adran 45 o Ddeddf Rhyddid Gwybodaeth 2000. Mae cod adran 45 yn nodi'r arfer a ddisgwyllir gan awdurdodau cyhoeddus wrth ymdrin â cheisiadau, gan gynnwys ymgynghori â thrydydd partïon perthnasol. Mewn perthynas â'r ddogfen hon, mae Archwilydd Cyffredinol Cymru ac Archwilio Cymru yn drydydd partïon perthnasol. Dylid anfon unrhyw ymholiadau ynghylch datgelu neu aildddefnyddio'r ddogfen hon at Archwilio Cymru yn swyddog.gwybodaeth@archwilio.cymru.

Rydym yn croesawu gohebiaeth a galwadau ffôn yn Gymraeg a Saesneg. Ni fydd gohebu yn Gymraeg yn arwain at oedi.

Cynnwys

Adroddiad cryno	
Pam y cynhaliom ni'r archwiliad hwn	4
Ein dyletswyddau archwilio	4
Ein hamcanion ar gyfer yr archwiliad hwn	4
Pam fod comisiynu'n bwysig	4
Yr hyn y gwnaethom fwrw golwg arno a sut y mae da'n edrych	5
Ein dulliau archwilio a phryd y cynhaliom ni'r archwiliad	5
Yr hyn a ganfuom	6
Ein hargymhellion i'r Cyngor	9
Atodiadau	
Atodiad 1 – cwestiynau a meini prawf archwilio	10

Adroddiad cryno

Pam y cynhaliom ni'r archwiliad hwn

Ein dyletswyddau archwilio

- 1 Rydym yn cynnal yr archwiliad hwn dan y dyletswyddau sydd wedi eu cynnwys yn:
 - adran 17 Deddf Archwilio Cyhoeddus (Cymru) 2004 (Deddf 2004) i helpu i alluogi'r Archwilydd Cyffredinol i fod wedi'i argyhoeddi (neu beidio) bod y Cyngor wedi sefydlu trefniadau priodol i sicrhau gwerth am arian o ran y modd y mae'n defnyddio ei adnoddau; ac
 - adran 15 Deddf Llesiant Cenedlaethau'r Dyfodol (Cymru) 2015 i helpu i alluogi'r Archwilydd Cyffredinol i asesu i ba raddau y mae'r Cyngor yn gweithredu yn unol â'r egwyddor datblygu cynaliadwy wrth gymryd camau i gyflawni ei amcanion llesiant.
- 2 Gall yr archwiliad hwn oleuo astudiaeth ar gyfer gwella gwerth am arian dan adran 41 Deddf 2004 hefyd.

Ein hamcanion ar gyfer yr archwiliad hwn

- 3 Ein hamcanion ar gyfer yr archwiliad hwn yw:
 - darparu sicrwydd bod gan gynghorau drefniadau priodol ar gyfer comisiynu gwasanaethau i sicrhau gwerth am arian o ran y modd y maent yn defnyddio adnoddau;
 - darparu sicrwydd bod cynghorau'n gweithredu yn unol â'r egwyddor datblygu cynaliadwy wrth gomisiynu gwasanaethau; ac
 - egluro sut y mae cynghorau'n mynd ati i gomisiynu gwasanaethau ac ysbrydoli a grymuso cynghorau a chyrff eraill yn y sector cyhoeddus trwy adnabod a rhannu enghreifftiau o arfer/dulliau nodedig lle y bo'n berthnasol.
- 4 Rydym yn cynnal yr archwiliad hwn ym mhob un o'r 22 o brif gynghorau yng Nghymru.

Pam fod comisiynu'n bwysig

- 5 Comisiynu yw'r broses a ddefnyddir gan y Cyngor i ddylunio gwasanaethau y mae'n bwriadu eu darparu. Mae'n dechrau â diffinio'r gwasanaeth a'r allbynnau a deilliannau a ddymunir ac yn diweddu pan fo'r Cyngor yn trefnu ei ddull darparu. Er enghraifft, trwy sefydlu tîm darparu yn fewnol, neu drwy gaffael cyflenwr allanol.
- 6 Gall trefniadau comisiynu helpu i sicrhau bod gwasanaethau'n cael eu darparu mewn modd darbodus, effeithlon ac effeithiol. I'r gwrthwyneb, gall gwendidau mewn trefniadau comisiynu leihaus effaith gwasanaethau a'u gwerth am arian, hyd yn oed os yw'r prosesau sy'n dilyn, megis caffael a rheoli contractau, yn gadarn.



Yr hyn y gwnaethom fwrw golwg arno a sut y mae da'n edrych¹

- 7 Fe wnaethom adolygu trefniadau'r Cyngor ar gyfer comisiynu gwasanaethau ac yn benodol i ba raddau y mae hyn wedi cael ei ddatblygu yn unol â'r egwyddor datblygu cynaliadwy; ac y bydd yn helpu i sicrhau gwerth am arian o ran y modd y defnyddir adnoddau'r Cyngor.
- 8 Nid oedd yr archwiliad hwn yn cynnwys trefniadau caffael na threfniadau rheoli contractau'r Cyngor.
- 9 Roedd yr archwiliad yn ceisio ateb y cwestiwn cyffredinol hwn: **Wrth gomisiynu gwasanaethau, a yw'r Cyngor yn sefydlu trefniadau priodol i sicrhau gwerth am arian o ran y modd y mae'n defnyddio ei adnoddau?**
- 10 Fe ddefnyddiom ni'r meini prawf archwilio a nodir yn **Atodiad 1**, sydd hefyd yn dangos y berthynas rhwng y meini prawf a'r cwestiynau archwilio. Goleuwyd hyn gan ein gwybodaeth gronnydd yn ogystal â'r hierarchaeth gwestiynau a dangosyddion cadarnhaol yr ydym wedi'u datblygu i ategu ein harchwiliadau o gymhwyso'r Egwyddor Datblygu Cynaliadwy.



Ein dulliau archwilio a phryd y cynhaliom ni'r archwiliad

- 11 Mae ein canfyddiadau'n seiliedig ar adolygiadau o ddogfennau, a chyfweliadau gyda'r uwch swyddog(ion) sy'n gyfrifol am ddatblygu dull comisiynu strategol y Cyngor. Fe wnaethom hefyd gyfweld ag uwch swyddogion â chyfrifoldeb am wasanaethau y mae'r Cyngor wedi'u comisiynu'n allanol.
- 12 O ystyried yr ystod eang o wasanaethau sydd gan y Cyngor, fe wnaethom brofi sampl o'r trefniadau y mae'r Cyngor wedi'u sefydlu i gomisiynu gwasanaethau. I wneud hyn, fe ddewisom ni dri gwasanaeth lle mae'r Cyngor wedi penderfynu comisiynu gwasanaethau'n allanol ac fe archwiliom ni'r trefniadau comisiynu y mae'r Cyngor wedi'u rhoi ar waith. Y sampl o feysydd gwasanaeth y gwnaethom eu hadolygu yn y Cyngor oedd:
 - Gwasanaeth eirioli i oedolion;
 - Rhwydwaith fysiau Sherpa'r Wyddfa; a hefyd
 - Canolfannau hamdden Byw'n Iach.

¹ Fe'i diffinnir fel 'yr hyn a ddylai fod' yn ôl deddfau neu reoliadau, 'yr hyn a ddisgwylir' yn ôl arfer gorau, neu 'yr hyn a allai fod', pe bai'r amodau'n well.

- 13 Mae'r dystiolaeth yr ydym wedi'i defnyddio i oleuo ein canfyddiadau'n gyfyngedig i'r ffynonellau hyn. Fe wnaethom y gwaith hwn yn ystod mis Rhagfyr 2024 a mis Chwefror 2025.
- 14 Rydym yn gwneud y gwaith hwn ym mhob un o'r 22 o brif gynghorau yng Nghymru ac, yn ogystal ag adrodd yn lleol wrth bob cyngor, rydym hefyd yn bwriadu cynhyrchu adroddiad cenedlaethol.



Yr hyn a ganfuom

- 15 Ar y cyfan, **canfuom na all y Cyngor ddangos ei fod yn sicrhau gwerth am arian fel mater o drefn drwy ei wasanaethau a gomisiynir**. Rydym yn nodi isod pam y daethom i'r casgliad hwn.
- 16 Canfuwyd gennym fod meysydd gwasanaeth unigol yn diffinio'n glir y gwasanaeth y mae'r Cyngor yn bwriadu ei gomisiynu a'i ganlyniadau arfaethedig. Gallent hefyd ddisgrifio sut mae'r gwasanaeth a gomisiynir yn helpu'r Cyngor i gyflawni ei ddyletswyddau statudol. Fodd bynnag, nid oes gan y Cyngor drefniadau i sicrhau bod hyn yn digwydd yn systematig ar draws pob maes gwasanaeth. Mae meddu ar ddealltwriaeth glir o pam mae gwasanaethau'n cael eu comisiynu, yr hyn y bwriedir iddynt ei gyflawni, a'r gwahanol opsiynau sydd ar gael yn elfennau pwysig o'r trefniadau i sicrhau gwerth am arian.
- 17 Nid yw'r Cyngor yn cynnal arfarniad cynhwysfawr o opsiynau comisiynu fel mater o drefn cyn penderfynu comisiynu gwasanaeth. Canfuom fod y Cyngor yn comisiynu rhai gwasanaethau i ddarparwyr allanol yn seiliedig ar y model cyflawni blaenorol ar gyfer y maes gwasanaeth yn hytrach nag ystyried opsiynau amgen. Nid oes ychwaith ar hyn o bryd unrhyw oruchwyliaeth gorfforaethol o gyfnodau contract ar draws gwahanol feysydd gwasanaeth. Mae hyn yn golygu y gallai cyfleoedd gael eu colli i sicrhau gwerth am arian. Er enghraifft, trwy aliniad gwell rhwng y meysydd gwasanaeth i baratoi arfarniad opsiynau mwy cynhwysfawr; neu drwy nodi cyfleoedd i gomisiynu gwasanaethau ar y cyd ar draws adrannau. Drwy beidio ag ystyried yr ystod lawn o ddulliau cyflawni posibl, ni all y Cyngor fod yn sicr bod yr opsiwn y mae wedi'i ddewis yn rhoi'r gwerth gorau am arian. Gellir cymhwyso graddfa'r asesiadau opsiynau yn gymesur yn ôl, er enghraifft, cost a chymhlethdod y gwasanaeth a gomisiynwyd.
- 18 Mae'r Cyngor yn defnyddio ystod eang o wybodaeth o ffynonellau mewnol ac allanol i ddatblygu ei ddealltwriaeth o'r ffactorau cyfredol a hirdymor sy'n debygol o effeithio ar wasanaethau a gomisiynir. Mae hefyd wedi nodi ffynonellau gwybodaeth a fydd yn ddefnyddiol wrth wneud penderfyniadau comisiynu nesaf a sut y gallai wella ei ddefnydd o ddata. Er enghraifft, bydd data a gyhoeddir gan Trafnidiaeth Cymru yn berthnasol i'r cylch comisiynu nesaf ar gyfer trafndiaeth gyhoeddus, yn ogystal â dadansoddi sylwadau defnyddwyr gwasanaeth a gasglwyd eisoes gan y Cyngor i sefydlu achosion sylfaenol y galw am wasanaeth.

- 19 Mae'r Cyngor yn defnyddio'r wybodaeth hon i gynllunio gwasanaethau a gomisiynir yn unigol dros amserlen briodol yn unol ag anghenion y maes gwasanaeth hwnnw. Gall y Cyngor ddisgrifio pam ei fod wedi dewis hyd y contract ar gyfer ei wasanaethau a gomisiynir a sut y bydd y cyfnodau hyn yn diwallu anghenion tymor byr. Fodd bynnag, nid yw mor glir sut mae trefniadau comisiynu'r Cyngor yn sicrhau bod ei wasanaethau a gomisiynir yn diwallu anghenion hirdymor.
- 20 Mae gan y Cyngor ddealltwriaeth gyfyngedig o oblygiadau adnoddau hirdymor wrth gomisiynu gwasanaethau. Mae cyllideb y Cyngor yn cynnwys costau tymor byr ar gyfer ei wasanaethau a gomisiynir ac mae'r Cyngor yn cynnwys cymalau cytundebol sy'n nodi'r trefniadau ar gyfer rheoli costau ychwanegol yn y dyfodol. Fodd bynnag, nid yw'n glir sut mae'r Cyngor yn ystyried costau oes gyfan gwasanaethau a gomisiynir fel rhan o'i ddull comisiynu. Mae'r Cyngor wedi ystyried sut y byddai rhai risgiau ariannol yn effeithio ar wasanaethau a gomisiynir ond nid yw wedi modelu effaith ystod o senarios lleihau cyllideb yn y dyfodol. Mae ystyried goblygiadau hirdymor a thymor byr penderfyniadau comisiynu yn lleihau'r risg o beidio â chyflawni gwerth am arian yn y tymor hwy.
- 21 Nid oes gan y Cyngor drefniadau corfforaethol i sicrhau bod gwasanaethau a gomisiynir yn asesu ac yn monitro gwerth am arian yn gyson. Gwelsom enghreifftiau o sut mae gwasanaethau'n nodi sut y bydd gwerth am arian gwasanaethau a gomisiynir yn cael ei fonitro yn y tymor byr, y tymor canolig a'r hirdymor. Fodd bynnag, mae'r diffyg trefniadau corfforaethol i sicrhau bod hyn yn cael ei wneud yn systematig yn ei gwneud yn anodd i'r Cyngor gael arolygiaeth a sicrwydd bod gwerth am arian wedi'i sicrhau drwy ei wasanaethau a gomisiynir.
- 22 Ychydig o ymwybyddiaeth sydd gan y Cyngor o'r effeithiau ehangach y gallai ei wasanaethau a gomisiynir eu cael. Nid yw'r Cyngor bob amser yn ystyried aliniad rhwng ei wasanaethau a gomisiynir a'i amcanion llesiant. Er enghraifft, dim ond un o'r gwasanaethau a gomisiynwyd a adolygwyd gennym a gyfeiriodd atynt. Yn yr un modd, nid yw'r Cyngor yn ystyried yn systematig sut y gall gwasanaethau wneud y mwyaf o'u cyfraniad at amcanion llesiant cyrff eraill yn y sector cyhoeddus. Darparodd y Cyngor dystiolaeth gyfyngedig hefyd o sut y mae'n ystyried yr effaith y gallai ei wasanaethau a gomisiynir ei chael ar y nodau llesiant cenedlaethol. Drwy beidio ag ystyried effaith ehangach gwasanaethau a gomisiynir, mae'r Cyngor mewn perygl o golli cyfleoedd i sicrhau buddion lluosog ac osgoi dyblygu.
- 23 Nid oes gan y Cyngor drefniadau i sicrhau ei fod yn cynnwys y rhai y mae gwasanaethau a gomisiynir yn effeithio arnynt fel mater o drefn yn y broses o'u cynllunio a'u darparu. O ganlyniad, nid oes gan y Cyngor sicrwydd ei fod yn ystyried yr amrywiaeth barn lawn wrth benderfynu sut i gomisiynu gwasanaethau.
- 24 Nid yw'r Cyngor fel mater o drefn yn nodi'r holl bartneriaid posibl y gallai weithio gyda nhw i gomisiynu gwasanaethau, er enghraifft ar y cyd, neu drwy fodelau partneriaeth eraill. Gwelsom enghreifftiau o weithio mewn partneriaeth lle mae'r Cyngor wedi nodi a mynd ar drywydd cyfleoedd i wella gwerth am arian drwy gomisiynu gwasanaethau mewn partneriaeth. Fodd bynnag, nid yw'r Cyngor yn ystyried yr holl gyfleoedd ar gyfer gweithio mewn partneriaeth ar draws pob maes

gwasanaeth fel mater o drefn. Gall gweithio gyda'r bobl a'r partneriaid cywir helpu'r Cyngor i sicrhau ei fod yn comisiynu gwasanaethau sy'n diwallu anghenion ei gymunedau, a'i fod yn darparu'r gwasanaethau hynny mewn ffordd sy'n sicrhau'r gwerth gorau am arian.

- 25 Nid yw'r Cyngor yn adolygu effeithiolrwydd ei ddull comisiynu yn rheolaidd. Nid yw'r Cyngor yn rhannu'n eang nac yn cymhwyso'r gwersi a ddysgwyd o'i ymagwedd at gomisiynu ar draws y sefydliad na gyda phartneriaid. Mae'n bwysig gwerthuso cost ac effeithiolrwydd trefniadau comisiynu er mwyn helpu i nodi meysydd i'w gwella, a rhannu'r hyn a ddysgwyd, ac felly sicrhau gwerth am arian.

Ein hargymhellion i'r Cyngor

Arddangosyn 1: ein hargymhellion i'r Cyngor

Argymhellion

A1 Sefydlu trefniadau comisiynu cyson

Galluogi'r Cyngor i sicrhau ei hun bod ei benderfyniadau ar gyfer comisiynu gwasanaethau yn cael eu siapio'n gyson gan:

- Arfarniad opsiynau cynhwysfawr (paragraff 17);
- cynllunio dros amserlen briodol a chydbwyso anghenion tymor byr a thymor hwy (paragraff 19);
- dealltwriaeth o'r goblygiadau hirdymor o ran adnoddau (paragraff 20);
- nodi sut y bydd yn asesu ac yn monitro gwerth am arian (paragraff 21);
- sicrhau bod effeithiau ehangach gwasanaethau a gomisiynir yn cael eu huchafu (paragraff 22); a
- gweithio gyda'r bobl a'r partneriaid cywir i ddylunio a darparu'r gwasanaeth (paragraffau 23 a 24).

A2 Ymgorffori trefniadau ar draws y Cyngor

Er mwyn sicrhau bod gwasanaethau ar draws y Cyngor yn dysgu o weithgarwch comisiynu, dylai'r Cyngor ymgorffori trefniadau comisiynu drwy:

- codi ymwybyddiaeth o drefniadau comisiynu a disgwyliadau (paragraff 15);
- gwerthuso gwerth am arian ei ddull o gomisiynu gwasanaethau yn systematig (paragraff 25); a
- rhannu'r hyn a ddysgwyd o weithgarwch comisiynu ar draws adrannau a chyda phartneriaid allanol lle bo'n berthnasol (paragraff 25).

Atodiad 1

Cwestiynau a meini prawf archwilio

Cwestiwn cyffredinol: Wrth gomisiynu gwasanaethau a yw'r Cyngor yn sefydlu trefniadau priodol i sicrhau gwerth am arian o ran y modd y mae'n defnyddio ei adnoddau?

Level 2 questions	Cwestiynau Lefel 3	Meini Prawf
A oes gan y Cyngor resymeg eglur dros gomisiynu gwasanaethau?	A yw'r Cyngor yn diffinio'n glir pa wasanaethau y mae'n bwriadu eu comisiynu a pham?	• Mae'r Cyngor yn nodi diffiniad clir o'r gwasanaethau y mae'n bwriadu eu comisiynu. • Mae'r Cyngor yn nodi 'pam' fod arno angen comisiynu'r gwasanaethau gan gynnwys: – effaith/deilliannau bwriadedig darparu'r gwasanaeth; ac – a fydd/sut y bydd y gwasanaeth yn helpu'r Cyngor i gyflawni ei ddyletswyddau statudol
	A yw'r Cyngor yn cynnal arfarniad cynhwysfawr o'r opsiynau comisiynu cyn penderfynu comisiynu gwasanaeth?	• Mae'r Cyngor yn ystyried yr ystod lawn o opsiynau comisiynu ar gyfer darparu'r gwasanaeth – gallai'r opsiynau gynnwys y canlynol, er enghraifft: – darpariaeth fewnol; – trefniadau partneriaeth neu ddulliau o gomisiynu o fewn ac ar draws sectorau; – allanoli'r gwasanaeth i ddarparwr arall trwy ymddiriedolaeth neu drefniant arall; a – chontractio'r gwasanaeth trwy broses dendro. • Mae'r Cyngor yn ystyried costau a manteision yr opsiynau o safbwynt darbodaeth, effeithlonrwydd ac effeithiolrwydd – gan gynnwys dros y tymor byr, canolig a hir. • Mae'r Cyngor yn cynnwys costau rheoli contract o fewn ei asesiad o opsiynau comisiynu. • Mae'r Cyngor yn cynnwys asesiad o risg ar gyfer pob opsiwn comisiynu fel rhan o asesu costau a manteision. • Mae'r Cyngor yn defnyddio amrywiaeth eang o wybodaeth o ffynonellau mewnol ac allanol i ddatblygu dealltwriaeth am y ffactorau cyffredol a hirdymor sy'n debygol o effeithio ar wasanaethau a gomisiynir.
A yw'r Cyngor yn cynllunio dros raddfa amser briodol?	A yw'r Cyngor yn ystyried beth mae hirdymor yn ei olygu wrth gomisiynu gwasanaethau?	• Mae'r Cyngor yn ystyried beth mae hirdymor yn ei olygu wrth gynllunio ei ddull o gomisiynu gwasanaethau – h.y. pa mor bell ymlaen all/ddylai gynllunio a pham. • Mae'r Cyngor yn ystyried sut y bydd yn taro cydbwysedd rhwng anghenion byrdymor a

Level 2 questions	Cwestiynau Lefel 3	Meini Prawf
		hirdymor wrth gynllunio ar gyfer comisiynu gwasanaethau gan gynnwys, er enghraifft, wrth bennu'r ffrâm amser ar gyfer contractau neu drefniadau comisiynu eraill
	A yw'r Cyngor yn deall y goblygiadau hirdymor o ran adnoddau wrth gomisiynu gwasanaethau?	- Mae'r Cyngor yn meddwl am yr adnoddau y bydd eu hangen arno dros y tymor canolig a hwy (costau oes gyfan) i ddarparu gwasanaethau a gomisiynir. - Mae'r Cyngor yn ystyried sut y gellid gweithredu ystod o senarios lleihau cyllideb yn y dyfodol mewn perthynas â gwasanaethau a gomisiynir.
	A yw'r Cyngor yn nodi sut y bydd yn monitro gwerth am arian gwasanaethau a gomisiynir dros y tymor byr, canolig a hir?	- Mae'r Cyngor yn nodi'r trefniadau monitro y bydd yn eu dilyn ar gyfer y gwasanaeth a gomisiynir - Dylai'r Cyngor ddisgrifio sut y bydd gwerth am arian gwasanaethau a gomisiynir yn cael ei asesu a'i fonitro gan gynnwys: - costau a manteision; a - Chynnydd tuag at gerrig milltir a mesurau tymor byr, canolig a hwy
A yw'r Cyngor wedi meddwl am yr effeithiau ehangach y gallai ei wasanaeth a gomisiynir eu cael?	Wrth gomisiynu gwasanaethau, a yw'r Cyngor yn ystyried sut y gall gynyddu eu cyfraniad at amcanion llesiant y Cyngor i'r eithaf?	Mae'r Cyngor yn ystyried sut y bydd gwasanaethau a gomisiynir yn effeithio ar ei holl amcanion llesiant ei hun i sicrhau manteision lluosog, osgoi dyblygu neu unrhyw ganlyniadau anfwriadol, e.e. ystyried amcanion tymor hwy, y gadwyn gyflenwi leol, cydnerthedd y farchnad ac effaith hyd contractau, bioamrywiaeth, a lleihau carbon
	Wrth gomisiynu gwasanaethau, a yw'r Cyngor yn ystyried sut y gall gwasanaethau gynyddu eu cyfraniad at amcanion llesiant cyrff eraill yn y sector cyhoeddus i'r eithaf?	Mae'r Cyngor yn ystyried sut y bydd gwasanaethau a gomisiynir yn effeithio ar amcanion llesiant cyrff eraill yn y sector cyhoeddus i sicrhau manteision lluosog ac osgoi dyblygu neu unrhyw ganlyniadau anfwriadol
	Wrth gomisiynu gwasanaethau, a yw'r Cyngor yn ystyried sut y gall gwasanaethau gynyddu eu cyfraniad at y Nodau Llesiant Cenedlaethol i'r eithaf?	Mae'r Cyngor yn ystyried sut y bydd gwasanaethau a gomisiynir yn effeithio ar y nodau llesiant cenedlaethol i sicrhau manteision lluosog ac osgoi dyblygu neu unrhyw ganlyniadau anfwriadol
A yw'r Cyngor yn gweithio gyda'r bobl a'r partneriaid iawn i ddylunio a darparu ei wasanaethau a gomisiynir?	A yw'r Cyngor wedi adnabod pwy y mae angen iddo eu cynnwys?	Mae'r Cyngor yn deall pwy fydd gwasanaethau a gomisiynir yn effeithio'n uniongyrchol ac yn anuniongyrchol arnynt. Goleuwyd hyn gan ddadansoddiad rhanddeiliaid neu ymarfer tebyg.
	A yw'r Cyngor yn cynnwys amrywiaeth lawn y bobl?	Mae'r Cyngor yn cynnwys yr amrywiaeth lawn o safbwyntiau wrth benderfynu sut i gomisiynu gwasanaethau.

Level 2 questions	Cwestiynau Lefel 3	Meini Prawf
		Mae'r Cyngor yn defnyddio canlyniadau gweithgarwch cynnwys i oleuo sut y bydd yn comisiynu gwasanaethau, gan gynnwys ei effaith ar grwpiau sy'n rhannu nodweddion gwarchodedig
	A yw'r Cyngor yn cydweithio gyda'r partneriaid cywir?	- Mae'r Cyngor yn deall yn dda pa bartneriaid a pha bartneriaid posibl y gallai weithio gyda hwy i gomisiynu gwasanaethau i wella gwerth am arian. Goleuwyd hyn gan ddadansoddiad cynhwysfawr o bartneriaid posibl a'u blaenoriaethau. - Lle mae cyfleoedd i wella gwerth am arian trwy gomisiynu gwasanaethau mewn partneriaeth yn cael eu hadnabod, mae'r Cyngor yn mynd ar eu trywydd.
A oes gan y Cyngor drefniadau i werthuso gwerth am arian ei ddull comisiynu?	A yw'r Cyngor yn mynd ati fel rhan o'r drefn arferol i werthuso effeithiolrwydd ei drefniadau comisiynu?	- Mae'r Cyngor yn adolygu effeithiolrwydd ei ddull comisiynu'n rheolaidd gan gynnwys: - I ba raddau y mae gwasanaethau a gomisiynir yn cyflawni'r amcanion y mae'r Cyngor wedi'u pennu; a - Gwerth am arian modelau comisiynu a ddewiswyd gan gynnwys ystyried mewnbynnau, allbynnau a deilliannau.
	A yw'r Cyngor yn mynd ati fel rhan o'r drefn arferol i rannu unrhyw wersi a ddysgwyd i oleuo ymarferion comisiynu yn y dyfodol?	Mae'r Cyngor yn rhannu ac yn cymhwyso unrhyw wersi a ddysgwyd o'i ddull comisiynu yn eang ar draws y sefydliad, a chyda phartneriaid lle y bo'n berthnasol.



Archwilio Cymru

1 Cwr y Ddinas

Caerdydd CF10 4BZ

Ffôn: 029 2032 0500

Ffacs: 029 2032 0600

Ffôn testun: 029 2032 0660

E-bost: post@archwilio.cymru

Gwefan: www.archwilio.cymru

We welcome correspondence and telephone calls in Welsh and English.
Rydym yn croesawu gohebiaeth a galwadau ffôn yn Gymraeg a Saesneg.